

**CUSTOS (Pierre), notaire de Villemur, minutes 1664, f° 268 (v°) & ss., Archives départementales de la Haute-Garonne, cote 3 E 21843, PH/JCHR/6877.**

Pactes de mariage, de beaufort  
de fabry,

Au nom de dieu soict **l an mil six cens soixante quatre** et le **vingt neufiesme** jour du mois de **novembre** après midy soubz le regne de nostre souverain et( )tres chrestien prince louis quatorze du nom par la grace de dieu roy de france et de navarre dans **villemur** dioceze bas montauban et seneschaucée de toloze, pardevant moy notaire , establys en personne noble **françois de pousols sieur de beaufort** rezidant audict villemur d une part et damoiselle **perrette de fabry de lacombe de bear(n) vefve** de monsieur m(aîtr)e **jean de lacroix** quand vivoict **advocat au parlemant de toloze** d autre lesquelles parties de gré sur le mariage entreux traicté, et que moyenant la grace de dieu s accomplira, ont faitz les pactes suivans en premier lieu qu'ilz seront conjointz en mariage et solempnizeront icelluy selon les constitutions de sainte mere eglise catholique et appostolique romaine dont parties font proffession a la premiere et seule requisition de l une ou de l autre les bans publiés et legitime empechemant cessant, pour le

.....  
ii°. lxix :

support des charges duquel mariage ladicte damoiselle de fabry c( )est constituéé en dot la somme de **quatre mil livres** t(ournoi)z payable presantemant la somme de mil livres en beaux meubles contenus en l( )inventaire sur cé esvalués et apreciés entre parties a ladicte somme de mil livres que ledict sieur de beaufort a rettirés et accorde avoir en son pouvoir, laquelle somme de mil livres avec l augmant d icelle suivant la coustume de la presant ville ledict sieur de beaufort a reconnue sur tous et chacuns ses biens presans et advenir, et pour les trois mil livres restans a esté convenu que led(it) sieur de beaufort n( )en rettirera que l( )intherest, pour lequel intherest **ladicte damoiselle de fabry luy bailhe la jouissance du chateau et metterie de saint maurisse** avec ses

dependances de la contenance de dux paires  
de labourage, a la charge par luy d'en payér  
les tailhes et autres charges, reparer les  
biens en bon pere de familhe, & de nourrir  
et entretenir **françoize de lacroix filhe de lad(ite)**  
**damoiselle espouze** pendant ladicte jouissance  
& sans que ledict sieur ny les siens a l'advenir

.....

puissent en rien demander pour quel cas ny  
pretexte que ce soict, soict il pour lesdictes  
reparations, despance, ny autrement a quoy  
il a par exprés renoncé, a esté neanmoins  
convenu qu'en cas de predecés de ladicte dam(ois)elle  
fucteure espouze, il sera permis a lad(ite) de lacroix  
de reprendre la jouissance desdictz biens en  
payant annuellement l'intherest desdictz trois  
mil livres, audict sieur de beaufort pendant sa  
vie, & a ladicte damoiselle fucteure espouze  
de dispozer de tous et chacuns ses biens,  
mesmes de ses bagues et( )joyaux en faveur  
de quy bon luy semblera, soy rezervant aussi  
ladicte damoiselle de fabry la jouissance et  
entiere dispozition tant en la vie qu( )en la mort  
de tous ses autres biens presans et advenir  
declarant lesdictes parties qu( )ilz font les  
presans pactes, suivnt les uz et coustumes  
de la presant ville et entendre estre telles  
assavoir que la femme predecédant le mary  
icelluy demure jouissant pendant sa vie des  
cas dottaux de la femme, et au contraire le  
mary predecédant la femme icelle a option de  
repettér sa dot avec le droict d'augmant, regle  
a la somme de deux mil livres quy est

.....

ii<sup>e</sup>. lxx :

la moityé de la constitution de ladicte  
damoiselle fucteure espouze, duquel augmant  
elle jouyra aussy sa vie durant, sy mieux  
jusques a la repettition de son dot et augmant  
ladicte damoiselle n( )ayme se contentér de la  
somme de deux cens cinquante livres t(ournoi)z pour sa  
pantion et entretien, ce quy sera a son choix  
et option, et luy appartiendra en outre toutes  
ses robes bagues et( )joyaux en l( )estat qu( )elles  
seront, et pour l'observation de ce dessus  
ainsy promis et stipulé par les parties icelles  
checune pour cé quy la conserne ont obligé tous

leurs biens presans et advenir qu( )ont soubzmis  
aux rigueurs de justice et l ont juré a dieu  
par seremant, faict et passé **dans la maison  
de la susd(ite) damoiselle** en presance de  
monsieur m(aîtr)e **anthoine de lerys conseiller  
aumosnier ordinaire du roy p(rest)bre et chapelain  
en l( )esglize nostre dame de paris et curé de  
villemur**, noble **jean pierre de sers sieur  
de saignes**, noble **bertrand de sers sieur  
de bondigoux pere et filz**, **cousins** dud(it) fucteur  
espoux, noble **hugues de lacombe sieur de  
leribosc cousin** de ladicte dam(ois)elle fucteure espouze  
monsieur m(aîtr)e **pierre de busquet sieur de  
fonblaque** con(seill)er du roy et maistre des eaux et forestz

.....  
monsieur m(aîtr)e **jean de molinier** conseiller  
du roy lieutenant en la judicature de villelongue  
au siege de villemur, m(aîtr)e **pierre prouho** advocat  
en parlemant, noble **jean de prevost sieur de  
belfil**, m(aîtr)e **estienne darcy** p(rest)bre, et le sieur **jean  
ychery** bourgeois de villemur, signes avec les  
parties et moy notaire /

Beaufort

P. Defabry

Deleris

Saignes de Labournerie

Bondigous

Lacombe

Busquet

Darcy

Molinier

Prouho, p(rése)nt

Prevost, presant

Ychery

Custos, not(air)e r(oyal)